

**Խ. ԱՐՈՎՅԱՆԻ ԱՆՎԱՆ ՀԱՅԿԱԿԱՆ ՊԵՏԱԿԱՆ ՄԱՆԿԱՎԱՐԺԱԿԱՆ
ՀԱՄԱԼՍԱՐԱՆԻ ԳԻՏԱԿԱՆ ՏԵՂԵԿԱԳԻՐ
УЧЕНЫЕ ЗАПИСКИ АРМЯНСКОГО ГОСУДАРСТВЕННОГО
ПЕДАГОГИЧЕСКОГО УНИВЕРСИТЕТА ИМ. Х. АБОВЯНА**

Հումանիտար գիտություններ №1-2 (34-35) 2018 Гуманитарные науки

**ՀԻՄՆԱԿԱՆ ԵՎ ԵՐԿՐՈՐԴԱԿԱՆ ՁԵՎՈՒՅԹՆԵՐԻ ՏԱՐԲԵՐԱԿՈՒՄԸ
ՄԱՍՆԱԳԻՏՈՒԹՅՈՒՆ, ԶԲԱՂՄՈՒՆՔ, ՊԱՇՏՈՆ
ՑՈՒՅՑ ՏՎՈՂ ՎԵՐՋՆԱԲԱՂԱԴՐԻՉՆԵՐՈՎ ԲԱՌԵՐՈՒՄ
ԶՈԼՖԱՅԱՆ Ռ. Պ.**

***Խ. Արովյանի անվան հայկական պետական մանկավարժական համալսարան, 0010,
Երևան, Տիգրան Մեծի 17
e-mail: rrdzh@mail.ru***

Ուսումնասիրության նպատակն է սահմանազատել երկարժեք ձևային երկու եզրերի բառակազմական գործառնությունները՝ սահմանելով մասնագիտություն, զբաղմունք, պաշտոն ցույց տվող հնչյունախմբերի հիմնական/արմատ/ և երկրորդական բառակազմական /ածանց/ արժեքների տարբերակման սկզբունքները:

***Բանալի բառեր.** հիմնական ձևային, երկրորդական ձևային, արմատ, ածանց, հնչյունախումբ, բառակազմական արժեք, երկարժեք ձևային, բառային իմաստ, ածանցային նշանակություն, մասնագիտություն, զբաղմունք, պաշտոն*

Ներկայացված է խմբագրություն 04.05.2018

Ժամանակակից հայերենում բաղադրյալ կազմություն ունեցող մի շարք բառերում հանդիպում են մասնագիտություն, զբաղմունք, պաշտոն ցույց տվող հնչյունախմբեր (վերջնաձևային), որոնք տարբեր լեզվաբանների կողմից դիտարկվում են մի դեպքում՝ որպես հիմնական ձևային՝ արմատ, մի այլ դեպքում՝ որպես երկրորդական բառակազմական ձևային՝ ածանց: Նման հակասական մոտեցումները թույլ չեն տալիս համակարգված ներկայացնել վերոնշյալ հնչյունախմբերի բառակազմական արժեքները և դժվարություններ են ստեղծում բառակազմության դասընթացում հիմնական և երկրորդական բառակազմական ձևայինները դասավանդելու, երկարժեք ձևայինները դասակարգելու հարցում:

Ներկայացվում են ժամանակակից հայոց լեզվի բառակազմության այս հարցի շուրջ եղած տեսակետները, պատճառաբանել մեր մոտեցումը՝ օգնելով ուսանողին և ուսուցչին ճիշտ կողմնորոշվելու մասնագիտություն, զբաղմունք, պաշտոն ցույց տվող մի շարք վերջնաձևայինների բառակազմական արժեքները որոշելիս:

Աղյուսակ 1.

Մասնագիտություն, զբաղմունք, պաշտոն ցույց տվող ձևայիններ

-բան	ակնաբան, բուսաբան, երկրաբան, թվաբան
-գետ	լեզվագետ, հայագետ, մատենագետ
-կալ	ծովակալ, կուսակալ
-հար	ջութակահար, շեփորահար, սրնգահար, թմբկահար
-պահ	գանձապահ, մեղվապահ, հաշվապահ
- վար	դասավար, մեքենավար, հաղորդավար, գործավար

Աղյուսակ 2.
Մասնագիտություն, զբաղմունք, պաշտոն ցույց տվող ձևություններ

-ակ	խոսնակ, բուժակ, պատվիրակ, սուգակ, պահակ
-ական	խորհրդական, գիտնական, հոգևորական
-արար	հավաքարար, ներկարար, գործարար, շինարար
-գործ	ժամագործ, գինեգործ, թիթեղագործ, կավագործ
-իչ	մարզիչ, նկարիչ, քննիչ, հսկիչ, ցրիչ, սափրիչ
-ող	լրագրող, զոդող, վաճառող, հորատող, մեքենագրող
-որդ	լողորդ, վարորդ, ուղեկցորդ, հեծանվորդ, միջնորդ
-պան	ախտապան, այգեպան, դոնապան, խանութպան
-(ա)վոր	արհեստավոր, բանվոր, կթվոր, հնձվոր, դատավոր
-ու	թոշակառու, խուզարկու, վաշխառու, վերակացու

Այս շարքերից միանգամից կարող ենք առանձնացնել *-ակ*, *-ական*, *-իչ*, *-ող*, *-որդ*, *-պան*, *-(ա)վոր*, *-ու* հնչյունն ու հնչյունախմբերը, որոնք ածանցներ են, քանի որ չունենալով ինքնուրույն, անկախ գործածություն՝ ոչ թե կոնկրետ նյութական, այլ ընդհանուր վերացական իմաստ են արտահայտում և ավելանալով հիմնական ձևություններին՝ արմատներին կամ բառերին վերջից՝ կազմում են նոր բառեր «մի բան անողի, ինչ-որ պաշտոն, մասնագիտություն ունեցողի» իմաստով:

Ինչ վերաբերում է *-արար*, *-բան*, *-գետ*, *-գործ*, *-կալ*, *-հար*, *-պահ*, *-վար* ձևություններին, ապա սրանցից *գետ*–ը, *պահ*–ը և *վար*–ը, անտարակույս, արմատներ են, քանի որ ունեն անկախ, ինքնուրույն գործածություն, նյութական իմաստն են արտահայտում և կազմելով բարդություններ՝ չեն փոխում իրենց բառային, այս դեպքում նաև բայա-հիմքի (գործողության) իմաստը: Համեմատենք.

գետ - լեզվագետ, հայագետ, մատենագետ $\leftrightarrow$ *գիտակ*, *գիտուն*– ակնառու է « գիտեցող, իմացող» իմաստը,

պահ - գանձապահ, մեղվապահ, հաշվապահ $\leftrightarrow$ *պահակ* - ակնառու է « պահող» իմաստը,

վար - մեքենավար, հաղորդավար, գործավար $\leftrightarrow$ *վարիչ*, *վարորդ*– ակնառու է «վարող» իմաստը:

Կասկած չի հարուցում նաև *- արար* ձևությոն՝ որպես ածանց: Ըստ Ս. Գալստյանի՝ *արար* -ը գործողի անվան նշանակությամբ ամենագործուն ածանցներից մեկն է, և այս կադապարով կազմվում են գոյականներ, որոնք գերազանցապես ունեն «նախատիպի ցույց տված առարկայով՝ որպես մասնագիտությամբ կամ մշտական զբաղմունքով զբաղվող անձ» բառակազմական նշանակությունը, ինչպես՝ *կոշկարար*, *կազմարար*, *գյուտարար*, *փորձարար* և այլն, և ածականներ՝ «նախատիպ բայի ցույց տված հատկանիշն ունեցող, նրանով մշտապես զբաղվող անձ» բառակազմական նշանակությունը, ինչպես՝ *խոռվարար*, *հաշտարար*, *փրկարար*, *շինարար* [1, էջ 113-114]:

Գ. Զահուկյանը վերջաձանց է համարում *արար*-ը՝ որպես օրինակ բերելով *հավաքարար, փրկարար բառերը* [2, էջ 180], իսկ «Ժամանակակից հայերենի վերջաձանցները » ենթավերնագրի ներքո թվարկելով վերջաձանցները՝ առանձնացնում է - *արար*-ի հետևյալ կիրառությունները.

ա) *արդյունարար, գործարար, կազմարար* և այլն,

բ) *բարերար, խոովարար, կեղծարար, հուշարար, նորարար* և այլն,

գ) *կործանարար, կռվարար, հավաքարար, հուշարար, փրկարար* և այլն [2, էջ 306]:

Այժմ անդրադառնանք *-բան, -գործ, -կալ, -հար* վերջնաձևություններին, որոնց ածանց թե արմատ լինելու հարցը հայ լեզվաբանության մեջ տարակերպ է մեկնաբանվում և միշտ չէ, որ ճիշտ են որոշվում ածանցների՝ իբրև բառակազմական-բառաստեղծական, և արմատների՝ իբրև հիմնական ձևությունների, սահմանները:

ԲԱՆ - Ա. Մարգարյանը գրում է. «(Ա)*բան*, (ա)*կալ* ... սրանք չեն զրկվել իրենց բուն արմատական իմաստից և առանձնաբար անգամ իբրև նյութական իմաստ ունեցող լեզվական միավոր են ըմբռնվում»: «...Բան բառն, օրինակ, որ բալ «ասել, խոսել» բայի մի հին ձևն է, մի շարք բաղադրություններում գործածվելով որպես վերջին բաղադրիչ՝ «իմացող, գիտցվող» նշանակությունն է արտահայտում և այդ նշանակությամբ էլ ոչ թե ածանցավոր, այլ իսկական բարդություններ է կազմում, ինչպես՝ երկրաբան- геолог, հնէաբան- палеонтолог, հնէաբան- археолог, կենսաբան- биолог, սրտաբան- кардеолог, հանքաբան- минералог, ստուգաբան- этимолог, այլն՝ լեզվաբան, իրավաբան և այլն» [3, էջ 190]:

Ս. Գալստյանը այս ձևության մասին այլ կարծիք է հայտնում՝ գրելով. « ... (Ա)բան ածանցը կազմում է գոյականներ «նախատիպի ցույց տված առարկայի ուսումնասիրությամբ զբաղվող գիտության ճյուղի մասնագետ» բառակազմական նշանակությամբ, ինչպես՝ *արվեստաբան, ակնաբան, բուսաբան*, եգիպտաբան, հունաբան [1, էջ 48]:

«...*Բան* արմատի բառային նշանակությունը որպես բաղադրության երկրորդ եզր գործածվելիս մթագնում է. *բան* երկրորդ բաղադրիչով բազմաթիվ բարդ բառեր ընկալվում են որպես ածանցավոր կազմություններ: (Ա) բան ածանցը դրվում է հիմնականում բաղաձայնահանգ հիմքերի վրա՝ *ա* հոդակապի պարտադիր գործածությամբ» [1, էջ 48]:

Հենվելով այն մտքի վրա, որ ածանցներ չեն կարող համարվել իրենց բուն բայական իմաստը պահպանած ձևությունները՝ կարծում ենք՝ Ս. Գալստյանն իրավացի է՝ վերոնշյալ կազմություններում *բան* ձևության ածանց համարելով, քանի որ *երկրաբան, լեզվաբան, հնէաբան, սրտաբան* բառերում *բան*-ը չի նշանակում. «1. աշխատանք կատարող, աշխատող, գործով զբաղվող » [1, էջ 168], այլ նշանակում է գիտության տվյալ բնագավառն ուսումնասիրող մասնագետ:

ԳՈՐԾ - Ա. Մարգարյանը գրում է, որ «*գործ, հար*... ձևությունները, մի շարք բաղադրություններում իրենց արմատական բայահիմքի իմաստից զրկվելով, իբրև ածանց են գործածվում, ինչպես՝ գինեգործ, այգեգործ...ջութակահար, սրնգահար...» [3, էջ 190]:

Այս ձևության ածանցային արժեքի մասին խոսում է նաև Ս. Գալստյանը՝ նշելով, որ *-(ա)գործ* ձևությամբ՝ որպես ածանց, իր նախատիպի ցույց տված առարկայի «դրանով զբաղվող, այն մշակող, դրա գործն անող մասնագետ» նշանակությունն ունի և հոմանշային հարաբերության մեջ է մտնում նույն իմաստն ունեցող *-արար, -իչ, -որդ, -պան* ածանցների հետ [1, էջ 264]:

Կարծում ենք, որ «գործ» արմատից առաջացած ածանցը շարունակում է կապված մնալ իր սերող ձևերի հետ՝ նշանակելով աշխատանք, 2. մասնագիտություն, արհեստ, զբաղմունք, աշխատանքի բնագավառ, 3. գործելը, գործունեություն, 4. պաշտոն, ծառայություն [4, 430], և «Ժամագործ», «հացագործ», «արծաթագործ» և մասնագիտություն ցույց տվող նման կազմություններում միջին տեղ է գրավում արմատի և ածանցի միջև, ուստի ճիշտ է այն անվանել ածանցակերպ:

ՀԱՐ, ԿԱՆ - Խոսելով կաղապարային բառադրիչի իրացումների մասին՝ Գ. Ջահուկյանը ածանցներ է համարում բառավերջում *հար-ը*՝ դաշնակահար, ջութակահար և *կալ-ը*՝ ծովակալ, կուսակալ բառերում [2, էջ 187]:

Երաժշտական գործիքի անվանում + «հար» բայահիմք կաղապարն ունի «այդ գործիքը նվագող երաժիշտ » նշանակությունը, այսինքն՝ կորցրել է իր բուն բայական իմաստը՝ «հարվածել, խփել» [5, էջ 844], ուստի և «նեղ մասնագիտությամբ երաժիշտ» անվանող բառերում պետք է համարել ածանց:

Ծովակալ, կուսակալ բառերում *-կալ* բաղադրիչն չունի «բռնելու գործողության», «կալուլ, կալնուլ» իմաստը, ուստի չի գործածվում իր բուն բայական նշանակությամբ: Ծովակալ բառում «կալ» բաղադրիչն ունի «ռազմածովային նավատորմի բարձրագույն հրամանատարական կազմի զինվորական կոչում և այդ կոչումը կրող անձ»-ի իմաստ [6, էջ 657], իսկ կուսակալ բառում՝ «1. նահանգի կառավարիչ, նահանգապետ, 2. իշխանության բարձրագույն ներկայացուցիչն ու կառավարիչը ծայրագավառներում, փոխարքա, 3. ծայրագավառների կառավարիչ հին Հայաստանում» իմաստը [4, էջ 784]: Ինչպես տեսնում ենք, *-կալ* ձևությամբ, գրկվելով «կալել, բռնել» գործողության իմաստից, բառավերջում կարող է ստանալ պաշտոնի ընդհանուր նշանակություն և ածանցային կիրառություն:

Այսպիսով, պետք է նշել, որ մի շարք ածանցների առաջացման համար հիմք են ծառայել բառարմատները, որոնք լեզվի պատմական զարգացման ընթացքում բառիմաստի մթագնման արդյունքում որոշ բաղադրյալ կազմություններում մթագնել են իրենց բուն արմատական իմաստը և վերացական ընդհանրական նշանակություն ստանալով, այսինքն՝ իմաստափոխվելով՝ վերածվել են ածանցների: Այս դեպքում մենք գործ ունենք բազմագործառույթ ձևությոնների, այն է՝ ձևով նույն, սակայն տարբեր գործառույթներ կատարող հնչյունախմբերի՝ արմատի կամ ածանցի հետ:

Կարծում ենք՝ *-արար, -բան, -գործ, -կալ, -հար* ձևությոնները, հանդես գալով բառավերջում և նշանակելով մասնագիտություն, զբաղմունք, պաշտոն՝ գրկվում են իրենց բուն բառային իմաստից և գործածվում որպես վերջածանց: Մինչդեռ *վերջաբան, առաջաբան, ասեղնագործ, ձեռագործ, ուղեկալ, բաժակակալ, ծնկահար, դաշունահար* բառերում վերոնշյալ բաղադրիչները պահպանում են իրենց բուն բառային իմաստները, ուստի և արմատներ են:

Ամփոփելով ուսումնասիրությունը՝ եզրակացնում ենք, որ մասնագիտություն, զբաղմունք, պաշտոն ցույց տվող մի շարք վերջնաձևությոնների բառակազմական արժեքները որոշելու համար անհրաժեշտ է հաշվի առնել, որ հայերենում կան երկարժեք ձևությոններ, որոնց հիմնական արմատ, թե երկրորդական բառակազմական՝ ածանց լինելու հանգամանքը որոշվում է ըստ այն մոտեցման, թե հայտնվելով բառավերջում և մասնակցելով նոր բառերի կազմությանը՝ սրանք պահպանում են իրենց բառային իմաստը, թե՛ ձեռք են բերում նոր՝ ածանցային նշանակություն:

ԳՐԱԿԱՆՈՒԹՅՈՒՆ

1. Գալստյան Ս., Ածանցումը և ածանցները ժամանակակից հայերենում, Երևան, 1978, էջեր 48, 113-114, 264 :
2. Ջահուկյան Գ., Ժամանակակից հայոց լեզվի իմաստաբանություն և բառակազմություն, Երևան, 1989, էջեր 180, 187, 306:
3. Մարգարյան Ա., Ժամանակակից հայոց լեզու (բառակազմություն, դարձվածաբանություն, բառարանագրություն), Երևան, 1990, էջ 190:
4. Ժամանակակից հայերենի բացատրական բառարան, Հատոր 1, Երևան, 1969, էջեր 168, 430, 784:
5. Ժամանակակից հայերենի բացատրական բառարան, Հատոր 3, Երևան, 1974, էջ 844:
6. Ժամանակակից հայերենի բացատրական բառարան, Հատոր 2, Երևան, 1972, էջ 657:

РЕЗЮМЕ

РАЗЛИЧИЕ ОСНОВНЫХ И ВТОРИЧНЫХ МОРФЕМ В СЛОВАХ, ОБОЗНАЧАЮЩИХ ПРОФЕССИЮ, ЗАНЯТИЕ, ДОЛЖНОСТЬ ДЖУЛФАЯН Р.П.

В работе исследованы словообразовательные элементы, которые обозначают профессию, занятие, должности.

Следует иметь в виду, что указанные составляющие элементы являются как отдельными корнями, так и суффиксами, которые образовались в течение исторического развития языка от соответствующих корней.

SUMMARY

On WORD-FINAL MORPHEMES INDICATING profession, occupation and position JULFAYAN R.P.

The composite words in the modern Armenian language feature clusters indicating profession, occupation and position, which can be divided into three categories according to their word-formative value: a – affixes, b – roots, c – multifunctional morphemes, i.e. compositions which can function both as roots and affixes on the level of word formation.

The current study is dedicated to those morphemes, which are interpreted differently in terms of being roots or affixes in the Armenian linguistics, and the boundary between roots and affixes are not always correctly set.